

SOALAN NO: 35

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB TUAN HEE LOY SIAN
[PETALING JAYA SELATAN]**

TARIKH : 31 MAC 2015 (SELASA)

SOALAN:

YB Tuan Hee Loy Sian [Petaling Jaya Selatan] minta PERDANA MENTERI menyatakan:-

- (a) jumlah kematian akibat daripada musibah banjir di Pantai Timur hujung tahun lalu dan kos kerugian yang dialami; dan
- (b) langkah-langkah Prosedur Operasi Piawaian (SOP) bagi menghadapi banjir besar seperti hujung tahun 2014.

JAWAPAN: YB. DATO' SERI DR. SHAHIDAN BIN KASSIM
MENTERI DI JABATAN PERDANA MENTERI

Tuan Yang di-Pertua,

Merujuk kepada statistik yang dikeluarkan Polis Diraja Malaysia, episod banjir musim tengkujuh yang lalu telah mengorbankan 25 orang di Negeri Kelantan, Pahang, Terengganu dan Perak.

Ekoran dari kejadian banjir besar ini, Kerajaan telah mengalami kerugian yang sangat besar. Seperti mana yang telah dimaklumkan Yang Amat Berhormat Perdana Menteri semasa pengumuman Semakan Bajet 2015 lalu, kerosakan dan kerugian harta benda dan infrastruktur awam pada banjir kali ini dianggarkan sebanyak RM2.9 billion.

Susulan dari kejadian banjir di Kuantan, Pahang dan Kemaman, Terengganu pada musim tengkujuh 2013-2014, YAB Timbalan Perdana Menteri dalam Mesyuarat Khas Jawatankuasa Pengurusan Bencana Pusat (JPBP) bertarikh 3 Januari 2014 telah mengarahkan supaya Pengendalian Tetap Operasi (PTO) Pengendalian Bencana banjir disemak serta ditambah baik dengan mengambil kira pengendalian banjir dalam situasi ekstrem.

PTO yang telah disemak semula ini menggariskan langkah-langkah yang perlu dilaksanakan pada setiap peringkat, antaranya adalah penyediaan Pelan Tindak Balas Bencana Tempatan di peringkat Daerah dan Negeri. Jawatankuasa Pengurusan Bencana Daerah dan Negeri yang masing-masing dipengerusikan oleh Pegawai Daerah/Residen dan Yang Berhormat Setiausaha Kerajaan Negeri perlu menyediakan

rancangan kesiapsiagaan dan tindak balas yang bersesuaian dalam pengurusan bencana. Persediaan menghadapi bencana tersebut hendaklah diperinci dan didokumenkan di dalam satu pelan tindakan supaya setiap petugas mengetahui dan boleh merancang dengan lebih berkesan tindakan-tindakan yang perlu pada peringkat sebelum dan semasa bencana berlaku.

Selain memperincikan peranan agensi sewaktu fasa tindak balas, PTO tersebut juga turut mengambil kira pengurusan perkara yang perlu dilaksanakan oleh setiap agensi dan jawatankuasa berkaitan pada setiap fasa pengurusan bencana secara holistik yang meliputi fasa sebelum (Pencegahan dan Kesiapsiagaan Bencana), fasa semasa (Tindak Balas Bencana) dan fasa selepas (Pemulihan Pasca Bencana).

Selain mengemaskini PTO Pengendalian Bencana Banjir, Prosedur Operasi Standard (SOP) agensi-agensi pelaksana harus dikaji, disemak serta dikemaskini supaya keupayaan dalam menghadapi situasi banjir ekstrem dan keadaan di mana air naik secara pantas dapat ditambah baik.

Sekian. Terima kasih.